

दिनांक 18.06.2024

समय: 18.45 बजे

आकाशवाणी जयपुर—अजमेर

प्रादेशिक समाचार।

- प्रधानमंत्री नरेन्द्र मोदी आज पीएम किसान सम्मान निधि री 17वीं किश्त जारी कीनी—9 करोड़ 26 लाख किसानों रा खातां मांय 20 हजार करोड़ रुपया ऊं बत्ती रकम भेजी ज्यी।
- प्रधानमंत्री ग्राम पंचायतां रा प्रमुखां ऊं योग अर मोटा अनाज रा बारा मांय जाग जगा र समग्र स्वास्थ्य ने जनता रो आन्दोलन बणावण बाबत् कह्यो।
- प्रदेश मांय नुवा चुणी ज्या पांच सांसद विधायक ओहदा ऊं इस्तीफो दीनो

अर

- प्रदेश रा घणखर जिलां मांय जोरदार गर्मी—मौसम विभाग आवता 48 घंटां मांय बीकानेर, भरतपुर अर जयपुर संभाग मांय अधिकतम तापमान 44 ऊं 47 डिग्री सेल्सियस बीचे दर्ज व्हेवण रा आसार।

0000

प्रधानमंत्री नरेन्द्र मोदी आज पीएम किसान सम्मान निधि री 17वीं किश्त जारी कीनी। आज वाराणसी मांय राख्यी ज्या किसान सम्मान सम्मेलन मांय वे नौ करोड 26 लाख किसानों रा बैंक खातां मांय पीएम किसान सम्मान निधि री बीस हजार करोड़ रुपया ऊं बत्ती रकम भेजी। हाल तांई 11 करोड़ ऊं बत्ता पात्र किसान परिवारां रा खाता मांय पीएम किसान सम्मान निधि रा तैत तीन लाख चार हजार करोड़ रुपया ऊं बत्ती रकम भेजी जा चुकी है। कार्यक्रम मांय प्रधानमंत्री कृषि सखी रा तौर ऊं खुद सेवक समूहां री तीस हजार ऊं बत्ती महिलावां ने सर्टिफिकेट दीना। प्रदेश रा ग्राम पंचायत मुख्यालयां, कृषि उपज मण्डियां अर कृषि विज्ञान केन्द्रां माथे प्रधानमंत्री रा कार्यक्रम रो सीधो प्रसारण करी ज्यो।

000

प्रधानमंत्री नरेन्द्र मोदी ग्राम पंचायतां रा प्रमुखां ऊं योग अर मोटा अनाज काम लेवण रा बारा मांय जाग जगा र समग्र स्वास्थ्य ने जनता रो आंदोलन बणावण बाबत् कह्यो है। वे ग्राम प्रधानां ने भेज्या खत मांय माण्ड्यो के पंचायत परिसरां, स्कूलां, आंगनबाडियां अर सामुदायिक स्वास्थ्य केंद्रां माथे योग आधारित कार्यक्रम राख र लोगां ने खास कर नौजवानां ने तनाव मुक्त जीवण रो तरीको अपनावण री प्रेरणा देवण बाबत् कह्यो। प्रधानमंत्री ग्राम पंचायतां रा सगळा रहवासियां ने 21 जून ने मनाया जावण वाळा 10वां अंतर्राष्ट्रीय योग दिवस री शुभकामनावां देता थकां कह्यो के ई साल अंतरराष्ट्रीय योग दिवस रो मुद्दो है — **स्वयं और समाज के लिए योग**। वे कह्यो के इण ऊं स्वस्थ देश बणावण री दिशा मांय सरकार री कोशिसां ने

और बधावो मिलेला। प्रधानमंत्री कह्यो के योग देश री जूनी संस्कृति रो तोहफो है। वे कह्यो के योग आसनां रो अभ्यास इंसान ने शारीरिक अर दिमागी तौर ऊं मजबूत बणावे है। प्रधानमंत्री कह्यो के योग अर मोटो अनाज यानि श्री अन्न शरीर अर दिमाग दोन्यू सारू जरूरी है।

000

केंद्रीय आयुष मंत्री प्रतापराव जाधव दृष्टिबाधित लोगों रा सुबीता सारू आज नई दिल्ली मांय ब्रेल लिपि मांय सामान्य योग प्रोटोकॉल पोथी रो विमोचन कीनो। वे बच्चों ने रुचि अर मनोरंजन सागे योग सीखण अर वां रो अभ्यास करण मांय मदद करण वाळी प्रोफेसर आयुष्मान कॉमिक रो विमोचन ई कीनो। ई रे अलावा आयुष मंत्रालय योग रा हलका मांय प्रौद्योगिकी अर स्टार्ट-अप ने बधावो देवण सारू माई जीओवी पोर्टल अर माई भारत पोर्टल माथे योगाटेक चैलेंज सारू कीनो है। इण रो मकसद योग ऊं जुड़्या साज-ओ-सामान, सॉफ्टवेयर अर दूजा सामान विकसित करण अर स्टार्ट-अप अर लोगों री पिछाण कर र वां ने बधावो देवणो है।

000

राज्य मांय 21 जून ने मनाया जावण वाळा अन्तर्राष्ट्रीय योग दिवस रा सिलसिला मांय आज ई न्यारी-न्यारी ठौड़ां कार्यक्रम राख्यी ज्या। अजमेर कने पुष्कर रा जयपुर घाट माथे आयुर्वेद विभाग री ओर ऊं आज योग रो पूर्व अभ्यास करायी ज्यो। पुष्कर रा सरकारी आयुर्वेदिक औषधालय रा चिकित्सा अधिकारी बतायो के ई साल ई योग ने घर-घर पूगावण री कोशिश करी जा रही है। इण ई सिलसिला मांय 20 जून ताई पुष्कर मांय न्यारी-न्यारी ठौड़ां योग अभ्यास करवायो जावेला। **भीलवाड़ा** मांय योग दिवस रे मौके जिला स्तर रो कार्यक्रम चित्रकूट धाम माथे राख्यो जावेला। **बालोतरा** मांय योग दिवस रो जिला स्तर रो कार्यक्रम जिला कलेक्ट्रेट परिसर मांय राख्यो जावेला। **कोटपूतली**-बहरोड़ अर बालोतरा जिलां मांय अन्तर्राष्ट्रीय योग दिवस रे मौके कार्यक्रम राखण रा बारा मांय विचार करण सारू जिला स्तर रा अहलकारां री मीटिंग राख्यी ज्यी। बूंदी रा खेल संकुल मांय आशा सहयोगिनियां अर आंगनबाड़ी कार्यकर्तावां सारू योग शिविर लगायी ज्यो जिण मांय योग प्रोटोकॉल अर मोटापो अर पेट री बीमारियां ऊं जुड़्या योगासनां रो अभ्यास करायी ज्यो।

000

प्रदेश ऊं नुवा चुण्यी ज्या पांच सांसद विधानसभा री सदस्यता छोड़ दीनी है। खीवसर रा विधायक हनुमान बेनीवाल आज विधानसभा अध्यक्ष वासुदेव देवनानी ने इस्तीफो सूप दीनो। इण ऊं पैली चार नुवा चुणी ज्या सांसद दौसा ऊं मुरारी लाल मीना, झुंझुनू ऊं बृजेन्द्र ओला, चौरासी ऊं राजकुमार रोट अर देवली-उनियारा ऊं हरीश मीना इस्तीफो दे दीनो हो। ई पाछे अब आं रा इस्तीफा रे कारण रीती व्ही विधानसभा री सीटां माथे अब उप चुनाव कराया जावेला। ध्यानजोग है के चार जून ने जारी करी ज्या लोकसभा चुणाव रा नतीजां मांय दौसा सीट ऊं मुरारी लाल मीणा, झुंझुनू ऊं बृजेन्द्र ओला, नागौर ऊं हनुमान बेनीवाल, टोंक-सवाई माधोपुर ऊं हरीश मीणा अर बांसवाड़ा ऊं राजकुमार रोट सांसद चुणी ज्या हा। विधानसभा सचिवालय कानी ऊं जारी पानड़ी रे मुजब स्पीकर आं विधायकां रा इस्तीफां मंजूर कर लीना है। ई बीचे राज्यसभा

सदस्य के.सी. वेणुगोपाल रे लोकसभा सारू चुण्या जावण रे कारण प्रदेश ऊं राज्यसभा री एक सीट ई खाली व्हे गयी है।

000

माध्यमिक शिक्षा विभाग रा निदेशक आशीष मोदी महात्मा गांधी स्कूलां मांय दाखिला सारू आज जयपुर मांय लॉटरी निकाली। प्रदेश री 3 हजार 737 महात्मा गांधी स्कूलां मांय दाखिला सारू 84 हजार ऊं बत्ता विद्यार्थी अर्जियां दीनी ही। महात्मा गांधी अंग्रेजी माध्यम स्कूलां मांय दाखिला सारू लॉटरी मांय चुणी ज्या विद्यार्थियां री लिस्ट ऑन लाइन पोर्टल माथे जारी कर दीरीजी है।

000

आकाशवाणी समाचार जयपुर री ओर ऊं प्रादेशिक समाचार बुलेटिनां मांय तीन नुवा आपराधिक कानूनां रा बारा मांय जाग जगावण सारू श्रृंखला चलायी जा रही है। ई। रा तैत आज पेश है भारतीय नागरिक सुरक्षा संहिता ऊं जुड़ी जाणकारी—तीन नुवा आपराधिक कानूनां मांय पैली री दण्ड प्रक्रिया संहिता री ठौड़ा लायी ज्यी भारतीय नागरिक सुरक्षा संहिता, 2023 मांय पीड़ित लोगां रा अधिकारां री केई तरीकां ऊं परिभाषा दीरीजी है जो पीड़ित लोगां ने अपराध रे खिलाफ कार्यवाही मांय सक्रिय भागीदार बणावे है। इण मांय पीड़ितां रा हक माथे खास ध्यान देता थकां वां री हिफाजत करण ऊं जुड़्या 30 ऊं बत्ता प्रावधान है।

000

प्रदेश मांय आज निर्जला ग्यारस सिरधा भाव सागे मनायी ज्यी। ई मौके जातरू पवित्र तळावां मांय स्नान कर र दान—पुण्य कीनो अर मिंदरां मांय दर्शन कीना। ई मौके केई ठौड़ां ठण्डा पाणी अर शर्बत री छबील लगा र राहगीरां री सेवा करी ज्यी। अजमेर कने पुष्कर सरोवर रा 52 घाटां माथे संवारे ऊं ई मोटी तादाद मांय जातरू स्नान करण लाग्या। **पाली** रा मिंदरां मांय भगवान ने खास तरीकां ऊं सजायी ज्या। शहर रा सिद्धि विनायक मिंदर रे बाहर जातरूआं ने लस्सी पाई ज्यी। **चूरू** रा मिंदरां मांय ई खास झांकियां सजाई ज्यी अर केई ठौड़ां ठण्डा पाणी अर शर्बत री छबील लगा र राहगीरां री सेवा करी ज्यी। **बारां** मांय लोगां ने शरबत पायी ज्यो अर खिचड़ी खिलायी ज्यी।

000

सीकर रा नुवा चुणी ज्या सांसद अमराराम राज्य मांय बिजली कटौती अर पाणी री परेशानी रा मुद्दा माथे राज्य सरकार की आलोचना कीनी है। आज सीकर मांय खबरनवीसां सागे बातचीत करता थकां अमराराम कह्यो के राज्य मांय पड़ रही तेज गर्मी रे बावजूद बिजली कटौती करी जा रही है जिण ऊं लोगां ने घणी परेशानी व्हे रही है। वे कह्यो के प्रदेश मांय पाणी री परेशानी ऊं ई जनता घणी परेशान है।

000

राज्य मांय चलाया जा रह्या एनीमिया मुक्त राजस्थान कार्यक्रम रा तैत बच्चां, किशोर—किशोरियां, टाबर जणबा री उम्र वाळी महिलावां, आस वाळी महिलावां अर दूध पावण वाळी मायडां मांय खून री कमी कम करण रा मकसद ऊं आज शक्ति दिवस मनायी ज्यो। ई मौके सर्वाईमाधोपुर जिला मांय जिला चिकित्सालय, सामुदायिक स्वास्थ्य केन्द्रां, प्राथमिक स्वास्थ्य केन्द्रां अर हैल्थ वेलनेस सेंटरां माथे हीमोग्लोबीन री जांच अर ईलाज करी ज्यो। सगळी महिलावां, आस वाळी महिलावां, दूध पावण वाळी मायडां अर किशोर उम्र री टाबरियां ने शक्ति दिवस रा बारा मांय

जाणकारी दीरीजी अर वां री जांच कर र ज़रूरी राय अर आयरन री गोळियां रो ईलाज दियो ज्यो। **बूंदी** मांय ई महिलावां अर बच्चां री स्वाथ्य जांच कर र वां ने ज़रूरी राय अर ईलाज दियो ज्यो।

000

प्रदेश मांय आज घणखर ज़िलां मांय ज़ोरदार तावड़ो पड़्यो। राजधानी जयपुर समेत केई ठौड़ां उमस रे कारण लोग घरां ऊं बाहर नी निकळ सक्या। सवाईमाधोपुर ज़िला मांय आज ई ज़ोरदार गर्मी रही, हालांकि दोपहरां पाछे री हल्की बरसात ऊं पारो थोड़ो उतर्यो। **बारां** रा नाहरगढ़ हलका मांय सिंज्यां री पोर तेज बायरो बाजण सागे व्ही बिरखा ऊं पारो थोड़ो उतर्यो। म्हाणा भरतपुर खबरनवीस बतायो के आज आंधी चाल्यां पाछे करीब आधा घंटा ताई व्ही बिरखा ऊं गर्मी ऊं थोड़ी साता मिली।

भीलवाड़ा ज़िला मांय ई तेज गर्मी रे कारण लोगां ने घणी परेशानी रो सामो करणो पड़्यो। **बूंदी**, **चूरू** अर **करौली** मांय ई आज ज़ोरदार गर्मी रही। मौसम विभाग आवता 48 घंटां मांय बीकानेर, भरतपुर अर जयपुर संभाग मांय अधिकतम तापमान 44 ऊं 47 डिग्री सेल्सियस बीचे दर्ज व्हेवण अर कठे-कठे लू बाजण रा आसार जताया है। ई दौरान राज्य मांय कठे-कठे 30 ऊं 40 किलोमीटर प्रति घंटा री रफतार ऊं बायरो बाजण रा आसार ई है।

000